



EDITORIAL

Pakusgon ang hukbong bayan aron batukan ang pasismo sa rehimeng US-Marcos

Sa umaabot nga mga bulan ug katuigan, kinahanglan nga hugtanon ug sistematiko natong palapdon ug palig-onon ang Bagong Hukbong Bayan (BHB) isip armas sa katawhang Pilipino sa pagbatok sa pasistang paghari sa rehimeng US-Marcos. Atubangan sa nagkagrabeng pagpanglupig sa katawhan, naggrabeng pagpanumpo sa pulitika, ug nagkagamay nga luna alang sa demokratikong pagpadayag ug paglihok, nagkadako ang panginahanglan nga hawanan ang dalan alang sa armadong pakigbisog.

Gipahamtang ni Marcos ang dili deklaradong balaod militar sa liboan ka mga baryo sa tibuok nasud aron pukanon ang pagsukol sa katawhang nanalipud sa ilang kinabuhi ug panginabuhian. Gihatagag dalan sa mga armadong tropa ni Marcos ang makawawon ug magun-ubong mga operasyong kumprador sa mga korporasyon sa mina ug mga plantasyon. Nagkadaghan ang mga kaso sa pagpamatay, pagpanghulga, ilegal nga pag-aresto ug pagpriso sa mga mag-uuma ug minorya nga mibarog ug misukol.

Bisan sa kasyudaran, walay hunong ang pagpaniid ug pagpangharas sa katawhan nga organisadong nana-

lipud sa ilang kaayuhan. Gipuntirya ni Marcos, ilabina, ang mga mamumuo, semi-proletaryado, mga batan-ong-estudyante ug uban pang sektor nga nagkahiusa sa katuyoang iaslang ang mga demokratikong pangayo. Gisampungang ang ilang mga baba aron pahinayon ang ilang mga singgit alang sa mas taas nga suhulan, mas ubos nga presyo, desenteng trabaho, igong badyet alang sa edukasyon ug mga katilingbanong serbisyo.

Sa milabayng kapin sa pito ka tuig, gatusan ka bilyong pondo sa katawhan ang gibubo ug giusik-usikan sa reaksyunaryong estado sa gubat aron sumpuon ang pakigbisog sa

katawhan alang sa nasudnong demokrasya. Dautang laraw niining pukanon ang BHB isip hinagiban sa demokratikong gahum sa katawhan, ug pagkahuman, targeton ug sumpuon ang organisadong han-ay sa katawhan. Pinakatamong niini mao ang makapatuyang sa paghari ang reaksyunaryong gahum sa nasud, ug gawasong makapangawat og bahandi ug makapahimulos ang mga imperyalista, dagkung burgesyakumprador, ug dagkung agalong yutaan.

Tungod sa mga internal nga kasaypanan nga gibunga sa mga kahuyangan sa pag-atubang sa todong-atake sa kaaway, nakasinati or seryosong kadaut ang lain-laing mga yunit sa BHB. Tukma sa panahon nga gipanawagan sa Partido ang usa ka kalihukang pagtul-id niadtong katapusan sa 2023 aron tul-iron ang nangaging mga sayop sa paglunsad sa rebolusyonaryong kalihukan, la-kip na ang lain-laing mga aspeto sa

gubat sa katawhan, aron ibalik ang hukbong bayan gikan sa pag-atras ngadto sa bag-ong pag-abante.

Sa giya ug inspirasyon sa kalihukang pagtul-id, naningkamot ang mga Pulang manggugubat sa BHB sa pagpaasdang sa malungtaron gubat sa katawhan. Pakyas ang deklaradong tumong sa rehimeng US-Marcos nga dugmukon ang armadong rebolusyon sa katapusan sa miaging tuig. Ang BHB nagpadayon karon sa pagpalapad ug pagpalalum sa baseng masa, sa pagpalig-on sa anti-pyudal ug anti-pasista nga pakigbisog sa katawhan, ug sa paglunsad sa mga taktikal nga opensiba batok sa mga notoryus nga pasistang elemento ni Marcos.

Sa pagpatuman sa kalihukang pagtul-id, kinahanglang hugot nga huptan sa tanang kadre ug rebolusyonaryong pwersa ang armadong pakigbisog isip nag-unang porma sa pakigbisog, samtang sekundaryo ang dayag nga kalihukang masa ug uban pang mga porma sa pakigbisog, sa pagtuman sa sentral nga tahas sa pagpukan sa neokolonyal nga estado sa mga burgesya-kumprador ug mga agalong yutaan. Kinahanglang palig-onon sa tanang myembro sa Partido ang kaandam sa paggunit og armas ug mosalmot sa armadong pakigbisog.

Kinahanglang aktibong motampo ang mga rebolusyonaryong pwersa sa kasyudaran sa kumprehensibong pag-abante sa armadong pakigbisog sa kabukiran. Atong hawanan ang halapad nga dalan alang sa pagmartsa sa labing daghang mamumuo, semi-proletaryado, ug petiburgesya nga intelektuwal gikan sa kasyudaran o bisan sa gawas sa nasud, ngadto sa dalan sa armadong pakigbisog. Kinahanglan sa BHB og mga kadre sa mga mamumuo ug mga intelektuwal nga magsilbing mga Pulang manggugubat, mga kumander, ug mga upisyal sa pulitika sa BHB, samtang kini nagsubay sa dalan sa subling pag-abante.

Aron makab-ot kini, kinahanglang subsub nga palapdon ug palig-onon ang kalihukang masa sa kasyudaran, iaslang ang pakigbisog sa masa, palapdon ang mga organisasyong masa, lakip na ang tago nga mga organisasyong masa, ug ipataas ang rebolusyonaryong kahimatngon sa mga rebolusyonaryong pwersa sa kasyudaran.

Sa mando sa Partido, abli sa ti-buok tuig ang mga ganghaan sa hukbong bayan alang sa integrasyon ug rekrutment, gawas pa sa mga anibersaryo sa Partido, BHB, o NDFP. Ang mga yunit sa BHB andam

nga modawat og mga grupo sa mga aktibista ug mga kadre gikan sa kasyudaran aron makigsandurot sa mga Pulang manggugubat, moagi sa mga pagbansay sa pulitiko-militar, moapil sa mga pagtuon, produksyon, o mga kulturanghong aktibidad, moalagad sa masang mag-uuma, mahimong mga dentista, medik, o mga magtutudlo sa masa, moapil sa kampanya batok sa pyudalismo, ug motampo sa pagtukod sa Pulang gahum sa demokratikong gubyerno sa katawhan.

Sama nga ang mga sanga ug mga seksyon sa Partido sa kabukiran adunay mga plano, ang mga komite ug mga sanga sa Partido ug mga rebolusyonaryong organisasyong masa sa kasyudaran ug kabaryuhan kinahanglang maghimo og usa ka tuig nga plano aron mapwesto ang programa alang sa grupo-grupo nga integrasyon o pagsampa sa hukbong bayan.

Ipadayon ang kampanya sa pagtuon mahitungod sa armadong pakigbisog isip nag-unang hinagiban sa pagsukol ug mahitungod sa disiplina sa BHB. Ipakaylap ang pagtuon sa nagpadayon nga kasaysayan sa armadong pagsukol sa katawhang Pilipino alang sa nasudnong kalingkawasan. Pagkuha og inspirasyon gikan sa mga kinabuhi sa rebolusyonaryong mga bayani, kinsa walay pagduhaduha nga naghalad sa ilang kahibalo ug kinabuhi alang sa katawhan.

Dungan niini, kinahanglang pakusgon ang kampanya sa pagkolekta sa tanang porma sa suporta alang sa hukbong bayan gikan sa pinansyal ug pagkaon ngadto sa mga hinagibang iggugubat, ingonman sa pag-atiman sa mga nagpatambal ug nagpaalim.

Kinahanglang palig-onon ang hunahuna ug lawas sa mga kadre ug aktibista nga makigsandurot o hingpit nga mosampa sa hukbong bayan, ilabina atubangan sa todong pasistang pag-atake sa kaaway. Sumala pa ni Mao, ang rebolusyon dili usa ka kumbira. Apan sa dangpanan sa masa, ang mga Pulang manggugubat busog sa ilang pagamuma ug pagmahal matag adlaw. **AB**

 Bolyum LVI Ihap 3 Pebrero 7, 2025 Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.	Unod Editorial: Pakusgon ang hukbong bayan aron batukan ang pasismo sa rehimeng US-Marcos 1 Kasong <i>impeachment</i> kontra kang Sara Duterte 3 Pagsaulog sa anibersaryo sa Partido sa Cordillera 4 Gubat sa katawhan, gidull sa LAB sa mga siyentista 5 Kalihukang pagtul-id ug pagbatok sa sayop 6 Mga protesta 7 Anibersaryo sa PKP, gilunsad sa Rizal 7 Sa mubong pagkasulti 8 AI ug ang mamumuong Pilipino 9 Pagpamig-ot sa sektor sa BPO, gikundena 9 Pagpamusil, iligal nga pag-aresto ug pagpamig-ot 10 Pagpanubag sa mga Duterte-Marcos 10
Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas	
 ang.bayan@cpp.ph	

Sa pagduso sa katawhan, *impeachment* ni Sara Duterte, hingpit nga gipasaka

Niadlong Pebrero 5, mipirma ang dili moubos sa 215 ka mga kongre-sista sa kasong *impeachment* o asunto batok kang Bise Presidente Sara Duterte aron palagputon siya sa pwesto. Gipadayon ang kasong *impeachment* batok kang Duterte human sa halos duha ka bulan nga pagdelatar niini sa rehimeng Marcos. Gipasiugdahan mismo sa anak sa Presidente nga si Ferdinand Marcos nga si Sandro Marcos ang pag-endorso sa pang-upat nga reklamo.

Gipasaka ang *impeachment* sa katapusang adlaw sa regular nga sesyon sa Kongreso. Sa wala pa kini, tulo ka *impeachment complaint* na ang gipasaka sa Kongreso. Ang ika-duha niini gisumite sa mga progresibong organisasyon ug indibidwal ug giendorso sa Koalisyon Makabayan.

Adunay pito ka artikulo ang pang-upat nga reklamong *impeachment*. Nag-una dinhi ang "pakigkunsabo aron patyon si Marcos, iyang asawang si Liza Araneta ug si House Speaker Martin Romualdez." Gihimo ni Duterte ang hulga niadtong Nobyembre 23, 2024 taliwala sa pagdungog sa anomalya sa paggastos niya sa *confidential funds* nga gigahin sa iyang upisina.

Ang uban pang mga basihan mao ang: korapsyon sa ₱615.5 milyon sa *confidential funds*; pagpanuhol ug korapsyon sa Department of Education; di mapatin-aw nga bahandi ug kapakyasan nga ibutyag sa iyang mga kabtangan sa Statement of Assets, Liabilities, and Net Worth; pagkalambigit sa ekstra-hudisyal nga pagpamatay sa Davao City, mga maniobra nga destabilisasyon, lakip ang pagboykot niya sa State of the Nation Address ug pagharang sa mga pagdungog sa Kongreso; ug "pangkinatibuk-ang kondukta" isip Bise Presidente ug ikaduhang pinakataas nga upisyal sa nasud.

Ang giendorsong resolusyon gipadala sa Senado nga maoy adunay katungdanan sa pagtukod sa korte nga modungog sa mga reklamo. Kung mapamatud-ang sad-an, dili lamang masipa sa pwesto si Duterte, mapugngan usab siya sa pagda-

gan pag-usab sa bisan unsang posisyon sa sunod nga mga eleksyon.

Ang pinakabag-ong tsapter sa bangiyay sa pakasyong Marcos ug Duterte usa ka timaan sa pagkusog sa panagbangi tali nila. Gipakita niini ang labaw pang paglalum sa pagkabahinbahin sa han-ay sa mga nagharing reaksyunaryong hut-ong, diin nag-ilogay sa mga burukrata-kapitalistang pribilehiyo ug gahum ang mga magkaaway nga paksyon ug pundok.

Mayor nga lakang ang *impeachment* sa pagkonsolida sa mga Marcos sa gahum niini sa pulitika, ilabina sa sulod sa militar, pulis ug depensa. Kauban niini, gipalig-on usab ni Marcos ang iyang pagkamatitud-anon sa imperyalistang US pinaagi sa labaw pang pagpakusog sa pakigtambayayong sa US sa mga propagandang anti-China ug operasyong nabal nga gidirehe sa US sa West Philippine Sea, sa takuban sa "pagpalambo sa soberanya sa Pilipinas."

Malipayong gidawat sa mga Pilipino ang *impeachment* ni Sara Duterte isip unang lakang aron manubagong ang Bise Presidente ug tangtangon siya sa iyang pwesto, isip lakang aron silutan siya sa iyang mga krimen sa katiwalian. Kinahanglan pang palig-onon ug palapdon sa mga katawhan ang ilang mga protesta aron iduso ang Senado nga magtigum dayon isip korte ug sugdan gilayon ang pagtaral.

Ang *impeachment* kadaugan sa kalihukang masa nga padayon sa pagpakusog sa protesta alang niini. Labaw niining palig-onon ang kabu-



but-on ug determinasyon sa katawhan aron singilon si Marcos mismo sa mas dagkung krimen sa korapsyon sa dagway sa iyang kaugalingong *confidential funds*, *pork barrel* sa pormang ayuda, pagkontrol sa binilyong pondo sa Maharlika Fund ug pagkuha sa "wala magasto" nga pondo sa PhilHealth. Kinahanglan usab nga manubag si Marcos sa pagbasura niya sa mga nakasampang kaso sa kinawat nga bahandi sa iyang pamilya nga nagkantidad og dili moubos sa ₱202 bilyon.

Sa bahin sa mga progresibong grupo, ilang gitan-aw isip kadaugan ang *impeachment* sa katawhang nakigbisog aron manubag ang mga Duterte ug ang ilang pundok sa mga paglapas sa tawhanong katungod. Matud pa nila, sa pagduso ug nagkahiusang paglihok, pagpanghingu-sog, ug pagbantay sa katawhan nakab-ot ang unang lakang sa pagpanubag sa korapsyon. Lakip sa panawagan nga hukmang sad-an si Duterte, gisingil nila ang rehimeng Marcos sa pagkainutil niini sa pagtubag sa nagkagrabeng korapsyon sa iyang rehimen.

Sa adlaw sa pagbotar, nagtigum sila atubangan sa Kongreso aron ipanawagan nga hukman dayon si Duterte. Adunay parehong protesta sa Cabuyao, Laguna.

Panaghiusa ug pagtuon isip pagsaulog sa anibersaryo sa Partido sa Cordillera

Sa usa ka nataran sa Cordillera, ang gitoohang madilatar nga selebrasyon sa anibersaryo sa Partido Komunista ng Pilipinas niadtong Disyembre 26, 2024 misaangpot sa usa ka pyesta sa panaghiusa ug pagtuon sa mga Pulang manggugubat ug masa.

Nag-ilaid sa kalisud ang masa sa Barangay Ranyag (Kahayag) nga naabtan sa mga kauban. Nihit ang tinuig nga abot sa humay tungod sa grabeng hulaw nga gisundan sa parada sa mga bagyo nga miigo sa rehiyon. Nalimitahan usab ang gawas-nong pag-adto sa masa sa mga sentrong lungsod aron makapamalit sa mga panginahanglanon tungod sa pagpamig-ot ug walay hunong nga mga operasyon sa AFP.

Tungod niini, dili malikayan sa pipila ka mga kauban nga mabalaka kung unsaon pagpahigayon ang selebrasyon. Unsa ang ilang ipakaon dihang nag-imbata man sila og mga mag-uuma? Busa sa buntag sa ika-26 sa Disyembre, wala na una nagpreparar ang mga Pulang manggugubat.

Apan pagkahapon, kalit na lang mibagting ang ilang *warning device*. Gikan sa kakahuyan, usa-usa nga mitunga ang mga taga-Baryo Ranyag.

"Mga kauban, aron masiguro ang atong seguridad, wala namo kamo paadtoa sa kabalayan. Kami na lang ang miduaw kaninyo aron madayon ang selebrasyon sa anibersaryo sa Partido," pagpasabot ni Mang Cesar, ang lider sa grupo. Kauban niya ang iyang asawa ug anak. Dala nila ang dakung selopin sa suman ug usa ka balde nga bilubilo. Sa likod ni Mang Cesar ang ubang mga tagabaryo nga nagdala og ispageti ug sugnod.

Dali-daling nangandam ug gipadayon sa mga kauban ang giandam nga programa. Sa porma sa mga drama, balak, kanta ug mugbong mga pakigpulong, gipakita nila ang nagkagrabeng krisis sa panginabuhi nga giantus sa katawhang Pilipino, ang nagkalalum nga panagbangi tali ni Marcos ug Duterte, ug ang pag-

gamit sa imperyalismong US sa mga neokolonya niini (lakip na ang Pilipinas) aron hagiton ang China.

Gipakita nila ang pagkawakaw sa mga nasudnon ug lokal nga dinastiya sa mga burukrata-kapitalista sa bahandi sa prubinsya, samtang tinuyo nga gipasagdan nga kulang sa mga katilingbanong serbisyo ang katawhan. Gihatagan usab og duut sa mga pasundayag ang kamahinungdanon sa padayon nga pagsalmot sa masa sa rebolusyon aron usbon ang ilang kahimtang.

"Ang tugon sa among amahan mao nga ampingan namo ang mga kauban tungod kay kamo ang tinuod nga nagpakabana sa among mga kabus. Kini usa ka tugon nga among ikabilin sa among mga anak ug apo," saysay ni Dani, usa sa mga mitambong sa selebrasyon. "Nasayod kami nga ang among kusog anaa sa panaghugpong ug hiniusang paglihok."

Wala dayon miuli ang mga tagabaryo human sa selebrasyon. Gilunsad nila ang asembleya aron tukuron ang lokal nga tsapter sa Pambansang Kalipunan ng mga Magsasaka ug giplanuhan ang hiniusang bungkalan sa usa ka luna sa ilang komu-

nal nga yuta. Giuyunan nila kung unsaon nga organisadong batukan ang giilaumang atake sa mga operasyong militar ug pagbalik sa RCSP.

Sa misunod pang mga adlaw, lain-laing mga espesyal nga kurso ug pagtuon ubos sa Padepa (Pambansa-demokratikong Paaralan) ang gilunsad sa pwesto sa BHB.

Adlaw-adlaw adunay nagaduaw sa lokasyon sa mga Hukbo—parehong mga batan-on ug tigulang. Miduaw ang uban aron magpatabang sa mga asignatura, ang uban alang sa yanong istoryahanay. Gipabalonan sila sa mga manggugubat og paglaom, kauban ang mga kinulit gikan sa kahoy nga luwag ug alho.

Sa katapusang adlaw sa mga kauban sa lugar, migradwar sa batakang oryentasyon sa Partido ang mga lokal nga aktibista nga giorganisa sa usa ka sanga sa Partido sa lokalidad.

"Mga kauban, gipatin-aw ninyo sa hingpit ang Programa sa Partido. Wala mi pagduhaduha nga mahimong myembro niini," pahayag ni Mang Cesar sa sinugdanan sa ilang panumpa sa atubangan sa bandila niini.

Sa ilang pagbiya sa Baryo Ranyag, gibalik-balikan sa mga kauban ang ilang mga kabalaka. Kinasingkasing nilang giabi-abi ang leksyon sa ilang kasinatian: Kanunay, sa tanang panahon, mosalig sa masa. **AB**



Gidala sa LAB ang gubat sa katawhan duul sa mga siyentista ug inhinyero

Gisaulog sa Liga ng Agham para sa Bayan (LAB) ang ika-49 nga anibersaryo niini niadtong Disyembre 2024. Sa usa ka sekretong panagtapok sa National Capital Region, mokabat sa 50 ka myembro ang nagtapok aron saulogon ang ilang anibersaryo ug ang ika-56 nga anibersaryo sa Partido Komunista ng Pilipinas.

Gidumdum ug gisaulog nila ang lain-laing kalampusan nga nakab-ot sa mga balangay niini ug mga pag-sulay nga nasinati sa tuig 2024, ilabina sa panahon sa unang tuig sa kalihukang pagtul-id. Giparangalan usab sa LAB ang tanang mga rebolusyonaryong martir gikan sa sektor sa syensya ug teknolohiya nga naghalad sa ilang kinabuhi alang sa katawhan ug rebolusyon.

"Nahimong tataw ang mga kalampusan sa mga kampanya, sa pagbalik sa pag-organisa sa han-ay sa baseng masa, ug sa pagpalambo sa suporta alang sa Bagong Hukbong Bayan (BHB)," sumala sa taho sa Agham Bayan, mantalaan sa LAB. Bisan pa niini, gipadayag nila nga daghan pang mga kahuyangan ang kinahanglang patigbabawan lakip na ang konserbatismo sa pagrekrut og bag-ong mga myembro.

Sumala sa editorial sa Agham Bayan, "kinahanglang klaro kanato, isip mga rebolusyonaryo, nga ang nag-una natong tumong sa paglunsad og kampanya mao ang pagtubag sa interes sa masa ug pagpadaghan ug pagpalig-on sa atong rebolusyonaryong pwersa." Niining 2025, gipamahayag sa LAB nga padayon niining ipatuman ang mga katungdanan aron makatabang sa pagpaa-bante ug pagpakusog sa rebolusyong Pilipino.

Dugang pa sa LAB, gipakita niini kanila nga posibleng tumanon sa usa ka siyentista ang rebolusyonaryong katungdanan nga iaslang ang nasudnon-demokratikong rebolusyon nga may sosyalistang perspektiba, gikan sa mga laboratoryo ug mga eskwelahan sa kasyudaran ngadto sa armadong pakigbisog sa kabanikanhan.

"Makanunayong ipatuman sa mga rebolusyonaryong siyentista, inhinyero, propesyunal, ug estudyante ang kalihukang pagtul-id aron makab-ot ang dugang nga kalampusan," kini nagkanayon. Pagandaman usab sa LAB ang ilang bulawanong anibersaryo sa Disyembre.

Biyolohista sa Hukbong Bayan

Usa si Ka Jerry sa mga rebolusyonaryong siyentista nga mitubag sa panawagan nga makigsandurot sa BHB. Milubog siya sa usa ka yunit sa hukbong bayan sa Luzon. "Alang kanako isip usa ka biyolohista, usa ka dakung oportunidad ang mahimong Pulang manggugubat aron palalumon ang atong kahibalo sa *biodiversity* sa atong nasud," matud niya.

Gikan sa mga lugar nga gipuyan, hangtod sa ginakaon, adlaw-adlaw nakig-uban ang Pulang manggugubat sa kinaiyahan. Kasagarang anaa sa kalasangan ug kabukiran ang mga yunit sa BHB. Usahay anaa sa mga patag nga lugar. Bisan og lain-lain ang kahimtang sa mga lasang, bukid, ug kapatagan, sa tanang mga higayon daw mga "field researcher" ang mga Pulang manggugubat sa ilang paglubog sa kinaiyahan.

Matud niya, "sa adlaw-adlaw nga buluhaton namo sa yunit, makita namo ang nagkalain-lain species—tanim, uhong, insekto, langgam, ug uban pa." Kanunay usab nga makakita ang yunit og mga endemiko o lumadnong tanom o hayop sama sa jade vine, corpse flower, hornbill o kalaw, ug daghan pang uban. "Daghang beses usab nga nakaadto ang yunit sa mga lugar nga posibleng wala pa pisi-



kal nga naadtoan sa mga siyentista—basin makadiskubre ta og bag-ong mga *species* dinhing mga lugar."

Nakatabang usab kuno ang pagkamaalam sa *biodiversity* alang sa panginahanglan sa pagkaon sa hukbong bayan ug sa masa. "Nagkalain-lain *species* ang gigamit namo sa gimpuhatong produksyon. Ilabina sa mga pig-ot nga sitwasyon sa mga lugar nga layo sa komunidad, kasaligan nga gigikanan sa pagkaon ang *biodiversity* sa kalasangan," saysay niya. Nagpatuman usab ang yunit sa BHB og mga palisiya aron malikayan ang pagdakop sa mga giilang *endangered species* o matang sa hayop nga nameligro nga mawala.

"Daghang posibleng makat-onan ug madiskubrehan mahitungod sa *biodiversity* sa atong nasud, sa konteksto sa pagsalmot nato sa rebolusyonaryong pakigbisog alang sa katawhang Pilipino," siya nagkanayon. Dugang pa ni Ka Jerry, pahinumdom usab ang maong bahandi kung nganong kinahanglang mosalmot sa gubat sa katawhan—aron maprotektahan ang kinaiyahan ug katawhan sa pagpangawkaw sa mga imperyalista ug lokal nga nagharing hut-ong. **AB**

Kalihukang pagtul-id ug pagbatok sa sayop nga linya

Sa Pebrero 8, saulogon sa katawhang Pilipino ang ika-86 nga adlawng natawhan ni Kauban Jose Maria Sison, *founding chairman* sa Komite Sentral sa Partido Komunista ng Pilipinas (PKP). Duha ka tuig na ang nakalabay sukad mipanaw si Ka Joma, apan nagpabilin pa gihapon siyang inspirasyon sa mga kabatan-onan ug sa tibuok katawhan. Ang iyang gibilin nga bahandi sa mga pagtulun-an ug kabilin lakip karon sa nagsilbing pundasyon ug giya sa gipasiugdang kalihukang pagtul-id sa Partido ug sa tibuok rebolusyonaryong kalihukan.

Lakip sa mga pagtulun-an mao ang panginahanglan nga hingpit nga makigbatok sa mga kontra-rebolusyonaryong ideya, nga nahimong taw sa Una ug Ikaduhang Banturang Kalihukang Pagtul-id (IBKP). Kini ang gihatagan og gibug-aton ni Ka Luis Jalandoni, usa sa mga nangulong upisyal sa National Democratic Front of the Philippines ug dugay nang kaabag ni Ka Joma. Gitumbok ni Ka Luis ang partikular ug krusyal nga papel ni Ka Joma sa pagpasiugda sa IBKP, sa pag-andam sa borador sa dokumentong "Subling Palig-onon ang Atong mga Bata kang Prinsipyo ug Tul-iron ang Kasaypanan."

"Niining panahona, daghang lain-laing ideya ang mituhup sa atong rebolusyonaryong kalihukan. Ang mga kasaypanang natumbok sa dokumento sa pagtul-id nakaimpluwensya sa panghunahuna ug ideolohiya sa mga kauban," matud ni Ka Luis. Dugang pa niya, bisan ang mga kauban sa Netherlands, diin sila nadestyero, dili luwas sa impluwensya niining sayop nga mga ideya.

Gisaysay niya, nga adunay mga yaweng lider kaniadto sa organisasyon sa Europa nga "nagdala na og linya sa ideolohiya nga sukwahi sa linya sa dokumento sa pagtul-id." Pagpatin-aw pa ni Ka Luis, lisud kaayo nga yugto alang kanila ang panahon sa paningkamot nga ipasabot ang dokumentong "Subling Palig-onon," ug kumbinsihon ang mga kauban

sa Netherlands nga masabtan ang kamahinungdanon niini.

Gipaambit usab niya ang kaso sa usa ka kanhing kauban nga misupak sa kalihukang pagtul-id pinasi-kad sa pagtuo sa iyang mga higala, imbes nga tun-an ug susihon ang dokumentong gipagawas sa Partido. Dugang pa ni Ka Luis, sa maong yugto usab mitumaw sa Netherlands ang terminong "kontras" sa mga "rejectionist" o nagdumili sa kalihukang pagtul-id.

"Kung wala mahitabo ang IBKP, ambot lang kung unsay posibleng dangatan sa atong rebolusyonaryong kalihukan," sumala ni Ka Luis. Gitumbok ug gitul-id sa Partido atol sa IBKP ang mga dagkung sayop nga milungtad sa kalihukan sulod sa


daghang katuigan. Lakip sa maong mga sayop ang linya sa "estrategikong kontra-opensiba" nga sukwahi sa tulo ka hugna sa gubat sa katawhan. Niadtong dekada 1980 sa Mindanao, nagtukod og hilaw nga dagkung pormasyong militar nga maoy hinungdan sa pagbiya sa buluhatong masa ug miresulta sa dagkung kadaot.

"Imbes nga susihon kung nga-nong nahitabo kadto, ang konklusyon sa mga kontras kay tungod adunay mga espiya sa kalihukan (o mga Deep Penetration Agent). Misangpot kini sa labing pait nga panahon sa atong rebolusyonaryong kasaysayan," asoy ni Ka Luis.

Sama sa kalihukang pagtul-id sa kasamtangan nga gipasiugdahan sa Komite Sentral, ang IBKP sa kinauyukan usa ka kalihukang pagtuon. Ang kakulang sa buluhatong pang-ideolohiya sulod sa daghang katuigan miresulta sa seryosong mga kasaypanan.

"Sa katapusan, gamay ra nga porsyento sa rebolusyonaryong kalihukan ang misaway sa kalihukang pagtul-id. Ang nahabilin mipailalum sa pagtul-id sa ideolohiya, pulitika ug organisasyon. Milig-on ang BHB. Nag-abli ang daghang gerilyang nataran sa hukbo. Nabawi nato pag-usab ang pagsalig sa atoa sa masa," dugang ni Ka Luis.

Saysay ni Ka Luis, adunahan kaayo ang bahandi sa pagtulun-an nga gibilin kanato ni Ka Joma. Sugod sa pagkatukod niini, pagtumbok sa mga kasaypanan, ug paguswag human sa mga kalihukang pagtul-id. "Sa iyang katapusang mensahe kanato, siya miingon: Dili mabuntog ang Nasudnon Demokratikong Rebolusyon sa katawhang Pilipino!"





Protesta sa UP. Sinemana ang protesta sa mga estudyante ug magtutudlo sa Unibersidad ng Pilipinas (UP) sa lain-laing kampus niini isip pagsugat sa ikaduhang semestre niadtong Enero. Gihatagag duut sa mga protesta ang pagkibhang sa badyet, hulga sa seguridad ug pang-akademiko kagawasan, lakip na ang panawagang “Duterte Panagutin, Marcos Singilin!”

Pinakadaku ang rali sa UP Los Baños diin kapin 800 ang mitambong sa “First Day Rage” niadtong Enero 27. Naglunsad usab og rali sa UP Tacloban niadtong Enero 13; UP Manila ug UP Visayas, niadtong Enero 20; UP Baguio, UP Diliman, UP DEPPO sa Pampanga, ug UP Cebu niadtong Enero 21; ug UP Mindanao niadtong Enero 28.

Pagdumdum sa Mendiola Masaker. Gidumdum sa Kilusang Magbubukid ng Pilipinas (KMP) ug mga demokratikong sektor ang ika-38 nga anibersaryo sa madugoong Mendiola Masaker niadtong Enero 22. Gilunsad nila ang usa ka porum sa Bantayog ng mga Bayani aron dumdumon ang 13 ka indibidwal nga namatay human gisugat og kabangis sa mga maton ni kanhing presidente Corazon Aquino ang liboang nagprotestang mag-uuma. Gisundan kini og martsa padulong Mendiola sa Maynila kung asa nahitabo ang mangilngig nga krimen.

Protesta kontra mahal nga multa sa Cebu. Nagprotesta niadtong Enero 25 ang mga drayber sa dyip ilalum sa Piston Cebu atubangan sa LTO Region 7 aron makmakon ang pagtarget kanila aron pahamtangan og mahal kaayong multa. Naalarma ang mga drayber sa Joint Administrative Order 2014-01 nga nagtakda og hangtud ₱27,000 multa alang sa mga gagmay ug hinimo-himong paglapas sa mga balaod trapiko.

Suporta ug kumpensasyon, giduso sa mga Batangueño. Nakapiket sa Department of Social Welfare and Development, Department of Agriculture ug Sugar Regulatory Administration-Main Office sa Metro Manila ang mga magtutubo ug mag-uuma gikan sa Batangas niadtong Enero 22. Sa pagpanguna sa Sugar-Batangas ug Alyansa ng Mga Mag-sasaka para sa Kumpensasyon, gisingil nila ang rehimeng Marcos og suportang pinansyal ug kumpensasyon alang sa mga naapektuhan sa grabeng kalamidad ug pagsira sa CADPI sa prubinsya.

Mga estudyante sa UE ug BCP, nagprotesta. Nagprotesta ang mga estudyante gikan sa University of the East (UE) ug Bestlink College of the Philippines (BCP) niadtong Enero aron batukan ang planong pagtaas sa matrikula ug pagpahamtang sa paantus nga mga palisya sa ilang eskwelahan. Sa UE, nagpiket sila sa kampus sa Caloocan ug Manila niadtong Enero 27-28 dungan sa gipahigayong “konsultasyon” sa UE mahitungod sa ginadusong 5% *tuition and other fees increase* (TOFI) sa unibersidad. Ayha niini, hiniusa silang nagdagkot og kandila samtang naglunsad og usa ka mubong programa sa UE-Caloocan niadtong Enero 24.

Sa BCP, nagprotesta usab ang mga estudyante sa Quezon City niadtong Enero 30 aron batukan ang dakung kapalpakan sa administrasyon atol sa pagsaulog sa anibersaryo sa eskwelahan niadtong Enero 26 sa Bataan. Gitawag kini sa Anakbayan-BCP ug mga estudyante niini og #BCPTortureDay tungod sa kadaghang aberya ug mahal nga gasto.

Panagtapok para sa anibersaryo sa PKP, gilunsad sa Rizal

SA HUGOT NGA pagtabang sa masa, malampusong napahigayon sa Bagong Hukbong Bayan (BHB)-Rizal (Narciso Antazo Aramil Command) ang pagsaulog sa ika-56 nga anibersaryo sa Partido Komunista ng Pilipinas sa prubinsya. Mitambong sa panagtapok ang mga myembro sa Partido ug mga rebolusyonaryong pwersa gikan sa sektor sa mga mag-uuma, kababayan-an, kabatan-onan-estudyante, mamumuo ug mga kabus sa kasyudaran. Nahimo kini sa taliwala sa grabeng operasyong militar sa gerilyang nataran.

Sa panagtapok, gilunsad ang pormal nga pagtuon sa pamahayag sa Komite Sentral alang sa anibersaryo diin kapin 50 ka tawo gikan sa kabanikanhan ug kasyudaran ang mitambong. Sa diwa sa kalihukang pagtul-id, kritikal ug mapaubsanong gitumbok sa pagtuon ang mga naglungtad pa gihapong mga kahuyangan nga kinahanglang patigbabawan sa kalihukang masa ug armadong pakigbisog.

Nagpahigayon usab og mga kulturang pasundayag ang Pulang Bandila sa BHB-Rizal ug ang mga mitambong nga rebolusyonaryong pwersa. Gipakita usab sa pagsaulog ang paghimo og mga biswal nga arte sa mga manggugubat ug mga rebolusyonaryong pwersa gikan sa kasyudaran mahitungod sa tema sa pamahayag sa Partido ug pagpalambo sa kalihukang pagtul-id. Daghan sa mga mitambong ang unang higayon nga nakasulod sa yunit sa BHB.

Human sa tanan, naglunsad ang yunit og “kapehan” sa temang “ang papel sa kabatan-onan sa kalihukang pagtul-id”. Sa pagpuli-puli sa pamahayag ug awit gikan sa mga Pulang manggugubat ug rebolusyonaryong pwersa, gipaambit ang kamahinungdanon sa kalihukang pagtul-id ug kung giunsa kini gipatuman sa matag usa.

Sumala sa mga bisita, nahimong pamatuod ang aktibidad nga walay pulos ang gipamulong sa reaksyunaryong estado nga nagkahuyang na ang rebolusyonaryong kalihukan. Sa pagtapos sa programa, daghan ang nagpadayag sa ilang tinguha nga magpabilin aron makigsandurot sa hukbong bayan.

62.7%

o 31.06 milyong Pilipinong adunay trabaho ang nagahimom sa simpleng trabaho ug nagadawat sa pinakaubos nga kasagarang suhulan (P378-P583/adlaw) niadtong Nobyembre 2024.

Gikan sa: EILER

9 ka nasud ang naghugpong sa koalisyong **The Hague Group** aron panubagon ang estado sa Israel sa mga krimen niini sa gubat ug krimen batok sa katawhan. **Gilangkuban kini sa South Africa, Belize, Cuba, Namibia, Bolivia, Honduras, Senegal, Colombia ug Malaysia.**



18 ka Israeli ang gibuhian sa Hamas bugti sa kapin 500 ka Palestinong bilanggong pulitikal. Kabahin kini sa kasabutang hunong-buto nga nagsugod niadtong Enero 19.



24,916

o kapin katunga sa mga pampublikong eskwelahan ang **walay prinsipal** tungod sa langan nga promosyon sa DepEd sa kwalipikadong mga magtutudlo.

\$2 trilyon

giburot sa bahandi sa mga bilyunaryo sa tibuok kalibutan niadtong 2024, 3 ka beses nga mas paspas kumpara sa 2023. Ang maong bahandi naggikan dili sa produksyon kundili sa mana, kroniyismo ug monopolyong gahum.



Ika-8

ang Davao City sa 500 syudad sa tibuok kalibutan nga adunay pinakagrabeng trapik, samtang ika-14 ang Manila.

Pinakagrabe usab sa Istanbul (Turkey), New York (US) ug Chicago (US).

Gikan sa: Tomtom Traffic Index

50 OBISPO

ang nagpadayag og pagbatok sa desisyon sa Korte Suprema nga nagpatugot sa dagkung kumpanya nga mangisda sa *municipal waters*. **533 sa 884 ka mga lungsod ang apektado sa maong desisyon.**

43%

gikibhang sa badyet sa Mindanao State University ug mga kampus niini sa BARMM alang sa 2025.



Paggamit sa AI batok sa mamumuong Pilipino

Atubangan sa komun nga reklamo, gitukod niadtong Enero 25 sa mga mamumuo sa BPO (*business process outsourcing*), telekomunikasyon, mga *delivery driver* ug uban pang trabaho nga ginapadagan sa mga *digital platform* ang Coalition of Digital Employees-Artificial Intelligence o CODE-AI. Gitukod ang maong koalisyon aron magrepresentar sa mga mamumuo ug empleyado atubangan sa nagkalapad nga paggamit sa teknolohiyang AI sa mga langyawng kumpanya. Ang CODE-AI gilangkuban sa BIEN, Riders Watch, Gabay sa Unyon sa Telekomunikasyon Supervisors-PLDT (GUTS-PLDT), Digital Justice, Computer Professionals Union, May Day Multimedia, ug Ecumenical Institute for Labor Education and Research.

Sumala sa usa ka pagtuon, 36% o 8.5 milyong trabaho sa Pilipinas ang apektado sa paggamit sa AI. Tulo ka milyon niini mga trabahong klerikal, kapin 2.5 milyon sa komersyo ug serbisyo, 500,000 trabahong teknisyen ug kaubang mga propesyon, ug 700,000 trabahong propesyunal. Halos duha sa matag 10 ka trabaho niining mga natad ang gikabalak-ang mawala tungod sa AI.

Sa industriya pa lang sa BPO, 300,000 trabaho ang gilaumanng mawala sa umaabot nga lima ka tuig tungod sa AI. Sa kasamtangan, daghan nang mga kumpanya sa industriya ang naggamit og AI alang sa adlaw-adlawng klerikal nga mga buluhaton ug pagtubag sa mga pangutana sa mga kliyente. Dugang pa niini, aduna'y dugang presyur sa mga empleyado aron paspason ang ilang trabaho gamit ang AI bisan wala'y bugting dugang-suhol ug benepisyo.

Unsa ang AI? Ang AI mao ang teknolohiya sa kompyuter nga naghatag og abilidad nga mosundog sa kinaadman sa usa ka tawo sama sa pagsabot sa pinulongan, pag-ila sa mga padron, pagsulbad sa mga problema ug paghimo og mga desisyon. Usa sa mga tipo niini mao ang gitawag og "generative" AI nga adunay katakus sa paghimo og teksto, hulagway, musika ug bidyu gikan sa halapad nga impormasyon nga natipun-og sa internet.

Gipasigarbo sa mga kumpanyang digital, uban sa reaksyunaryong estado sa Pilipinas, nga magmugna og bag-ong mga trabaho ang AI sa nasud. Bisan pa, sumala sa CODE-AI, dili mabawi ang gibananang 100,000 nga mga bag-ong trabaho nga mahimo pinaagi sa AI kumpara sa gidaghanon sa mga trabaho nga mawala tungod niini. Dugang pa, giisip ang Pilipinas nga usa ka "digital sweatshop." Nagpasabot kini nga ang klase sa trabaho nga

may kalabutan sa AI nga ginapasa sa mga Pilipino nakatutok sa balik-balik (*routine*) nga mga buluhaton sama sa *data annotation* ug content moderation nga pareho usab mga trabahong "pangbansay" alang sa lain-laing klase sa AI. Ubos kaayo ang suhol alang sa maong mga trabaho (\$1-3/oras), layo kung itandi sa mga mamumuo nga pareho ang trabaho didto sa ubang nasud (\$15/oras, kung sa US). Walay seguridad sa trabaho ang mga mamumuo dinhi ug wala silay proteksyon gikan sa abuso.

Karon pa lang, gatusan ka libo na ka mamumuo ug propesyunal sa Pilipinas ang nagatrabaho sa langyawng kumpanya isip "freelancer" sa mga kumpanyang digital. Nagkumpetensyahanay sila sa usag usa alang sa gamayng trabaho nga ilang ginatanyag, lakip na ang mga *social media platform* sama sa Meta (tagiya sa Facebook ug Instagram) ug mga ahensya gikan sa ubang estado sama sa US. Ubay-ubay kanila mga bag-ong gradweyt nga walay masudlang trabaho sa kursong ilang gikuha.

Gikontrolar ang teknolohiyang AI sa pipila lamang ka monopolyong kumpanya nga nakabase sa US. Usa niini ang OpenAI nga naghimo sa GPT. Aduna usay kaugalingong teknolohiyang AI ang mga *social media platform* sama sa Llama sa Meta, Gemini sa Google ug Grok sa Twitter. Niining Pebrero lang, mibutho ang kaugalingong modelong AI sa usa ka kumpanyang Chinese nga Deepseek.

Dili ikalimod nga ginapalambo sa teknolohiyang AI ang proseso sa pagtrabaho, ilabina alang sa mga trabaho nga balik-balik, yano ug makalaay. Apan tungod kay kini gipang-iya ug kontrolado lamang niining mga monopolyong kapitalista, dili ikalimod nga gamiton kini batok sa mga mamumuo, ilabina sa mga atrasadong nasud sama sa Pilipinas, nga walay natagamtam nga mga katungod.

Pagpamig-ot sa Sektor sa BPO, gikundena

GIKUNDENA SA CODE-AI ang dili makatarunganong pagsisante kang Renso Bajala, tigpamaba sa BIEN, human siya nahinabi sa usa ka reporter mahitungod sa kahimtang sa mga mamumuo sa mga kumpanyang BPO nga naggamit og AI. Gisisante si Bajala tungod sa "palisiya sa social media" sa kumpanyang Concentrix ug American Express. Lapas ang pagtangtang kaniya sa katungod sa pagpadayag ug sa katungod sa pareho niyang mamumuo.

"May katungod kami sa gawasong pagpadayag ug asosasyon, ug importante kaayo ang among partisipasyon sa mga diskusyon ug paghimo og mga palisiya sa paggamit sa teknolohiyang AI aron maprotektahan ang mga katungod sa mga mamumuo," matud ni Bajala.

Grabeng paglapas sa katungod, nataho sa Masbate, Cagayan, Davao ug uban pa

Walay hunong ang mga paglapas sa tawhanong katungod sa mga pwersa sa Armed Forces of the Philippines (AFP) ug Philippine National Police (PNP) batok sa katawhang Pilipino sa miaging mga semana.

Pagpamusil. Niadtong Enero 19, naigo ug nasamdan sa likod ang 61-anyos nga kanhing barangay kagawad ug mag-uuma nga si Marcial Detalo sa paturagas nga pagpamusil sa mga sundalo sa 2nd IB sa Sityo Balunos, Barangay Rizal, Dimasalang, Masbate. Aron tabunan ang krimen ug pagbutang sa peligro sa mga sibilyan, malisyosong gipahayag sa midya sa 2nd IB nga naigo sa bala sa Bagong Hukbong Bayan (BHB)-Masbate si Detalo atol sa gipagawas nga usa ka engkwentro sa lugar.

Pag-aresto. Niadtong Enero 27, gidakop sa mga pwersa sa estado ang 70-anyos nga si Myrna Cruz-Abraham, beteranong aktibista, sa San Rafael, Bulacan. Gidakop ang biktima pinasikad sa mandamyento de aresto nga gipagawas sa usa ka korte sa Cagayan kalabot sa mga kasong pakyas nga pagpatay ug pagpatay. Gitaho sa mga grupo sa tawhanong katungod nga nakagawas si Cruz-Abraham human sa walo ka adlaw.

"Terrorism financing." Gipasakaan og mga hinimo-himong kaso sa "pagpondo sa terorismo" ang lima ka aktibista gikan sa Cagayan Valley.

Gikasuhan silang Isabelo Adviento, lider mag-uuma; Cita Managuelod nga peasant advocate; Agnes Mesina, koordineytor sa Makabayan Cagayan Valley; Jackie Valencia, tigpanalipud sa tawhanong katungod; ug si Deo Montesclaros, usa ka peryodista. Silang tanan dugay nang nanalipud sa katungod ug kaayuhan sa katawhan sa Cagayan Valley ug sa katawhang Pilipino.

Demolisyon. Sa tunga-tunga sa pagpahulay sa mga residente, maluibong misulong niadtong Enero 29, alas-2 sa kadlawon, ang 200 ka mga maton ug mga sakop sa mangilugay og yuta nga si Caroline Piñeda sa Dalat/Purok 47, San Roque, Bangkal, Davao City aron ipatuman ang demolisyon. Giguba ug giransak sa mga badigard ang 20 ka balay sa maong komunidad. Ang insidente kabahin sa serye sa demolisyon sugod pa niadtong Disyembre 2024.

Sa Laguna, gimakmak sa mga residente ang pag-abot niadtong Enero 31 sa 8-10 ka mga tawong demolition team sa Barangay Nueva, San Pedro, Laguna aron ipatuman ang demolisyon sa baybay riles. Niadtong Enero 7, nagpahimangno ang Department of Transportation sa mga lokal nga sila palayason sa maong adlaw bisan pa sa kawalay "court order" alang sa demolisyon.

Pugos nga pagpasurender. Narekord ang lain na usab nga serye sa militarisasyon ug pugos nga "pagparehistro" sa Philippine Army sa mga mangingisdang sakop sa Timek La Union sa Barangay San Manuel Norte, Agoo, La Union niadtong Enero 20. Nataho ang paglibot-libot sa nakasibilyan nga pitong sakop sa Philippine Army sa nahisgutang barangay sa pagpanguna sa usa ka "Captain Fernandez." Bitbit sa mga sundalo ang usa ka listahan nga naglangkub sa 30 ka ngalan sa mga kasamtangan ug kanhing sakop sa TIMEK La Union ug gipangita sila aron "irehistro" ang ilang organisasyon.

Sa Masbate, nagbubu og mga sundalo ang AFP sa magkasikbit nga mga barangay sa Baang, Sawmill, Barag ug Mapuyo sa lungsod sa Mobo, Masbate niadtong Enero 27 aron gukdon ug "pasurenderon" ang sibilyang ginganlag Sony Damos.

Mga protesta para panubagon ang mga Duterte ug paninglon si Marcos, gilunsad

NAGTAPOK ANG LAIN-LAINING demokratikong grupo sa Liwasang Bonifacio, Manila niadtong Enero 31 aron ipahigayon ang protesta batok sa "3K" o ang Kilos Bayan batok sa kalisud, korapsyon ug kawalay tulubagon. Mitambong sa protesta ang mga estudyante, magtutudlo, mamumuo, propesyunal, mga tawong-simbahan, administrador sa unibersidad, ug progresibong partido. Gipangunahan kini sa Taumbayan Ayaw sa Magnanakaw at Abusado Network Alliance (TAMA NA).

Susamang mga protesta ang gilunsad sa Naga City, Cebu City, Iloilo City, ug Bacolod City sa pagpanguna sa TAMA NA ug mga bala-ngay sa Bagong Alyansang Makabayan. Niadtong adlaw, duha pa ka protesta ang gilunsad sa laing mga grupo, pareho atubangan sa People Power Monument sa EDSA.

Ayha niini, gilunsad ang pagdagkot og kandila ug mugbong protesta niadtong Enero 30. Niadtong Enero 27, nagprotesta ang mga konseho sa mga estudyante, mantalaang pangkampus ug grupo sa kabatan-onan sa Liwasang Bonifacio sa pagpanguna sa Leaders and Advocates of the Youth for the Accountability of Sara Duterte (LAYAS Duterte) Network nga gitukod niadtong Enero 23.

Niadtong Enero 26, nagmartsa ang mga magtutudlo ubos sa Alliance of Concerned Teachers sa Baguio City alang sa sweldo, badyet sa edukasyon ug pagpanubag sa kalisud, korapsyon ug impunity sa guberno. Giduso nila ang impeachment kang Duterte nga matud nila napakyas sa pagserbisyo isip kanhi kalihim sa Department of Education.

Niadtong Enero 24, gipasiugdahan sa Kilusang Mayo Uno ang protestang "UWIAN Na" alang sa suhulan ug batok sa pagpangawat sa Quezon City. Ang panawagang UWIAN Na naggikan sa "Unite for Wage Increase at Against Nakaw sa Gobyerno."